

NAQQIUT

Erstatter bilag 1, dateret d. 2. juli 2024

Inatsisissatut siunnersuummut oqaasertaliussani oqaatsitigut eerseqissaasoqarpoq)



Ulloq: 23. september 2025
Allaffik: Nordatlantkontoret
Suli.sulia.: Sessie Holm-
Hemmingsen
Suliap normua: 2020-00578
Takussutissiaq: 3338911

Uunga Siunnersuut

Sakkut pillugit Kalaallit Nunaannut inatsisip allanngortinneqarnissaa
pillugu inatsit
(Aallaasinik il.il. pigisaqarnissamut ukiutigut angusassaq killissaatitaq
aamma aallaasit toqqorsimanissaannut piumasaqaat)

§ 1

Sakkut pillugit Kalaallit Nunaannut inatsimmi nr. 1008-mi 19. december
1992-meersumi, inatsisikkut nr. 572-ikkut, 10. maj 2022-mit aamma
inatsisikkut nr. 242-kkut, 7. marts 2023-meersumit allanngortinneqartumi,
allannguinerit tulluuttut suliarineqassapput:

1. § 1, imm. 1-imi »sanianissaq« ima allanngortinneqassaaq: »sananissaq«

2. § 1-p kingorna ilanngunneqassaaq:

»§ 1 a. Inunnut 15-ileereersimanngitsunut tulluuttunik eqqussinissaq,
sananissaq, pissarsinissaq, pigisaqarnissaq, nassatarinninnissaq imaluunniit
atuinissaq inerteqqutaavoq, taamaattoq imm. 2 takuuk:

- 1) Sakkut kiisalu pequtit § 1, imm. 1-imi ilaatinneqartunik
- 2) Aallaasit allat aamma pequtit, § 1, imm. 1-imi ilaatinneqartunit
allaanerusut, matumani aallaasitut isikkoqartut aamma
sananeqarnermik imaluunniit atorussat atorneqartut malitsigisaanik
taamaattunngorlugit sanaqqinneqarsinnaasut ilanngullugit,
- 3) Nr. 2-imi taaneqartut aallaasit savissat, silussaatai aamma makisartui.

- 4) Nr. 2-mi taaneqartunut aallaasinut imassat, matumani aamma patruunit puui, ikittaatit (tændskruer), qaartartui (fanghætter), kukuttaatit aqerlussallu ilanngullugit.

Imm. 2. Imm. 1 apeqqutaatinnagu, inuk 15-ileereersimanngitsoq, aamma sunngiffimmi aallaaniarsinnaanermut allagartamik atuuttumik pigisalik, inuk naleqquttumik 18-ileereersimasumik aamma inuussutissarsiutigalugu piniarsinnaanermut allagartamik imaluunniit sunngiffimmi aallaaniarsinnaanermut allagartamik atuuttumik pigisalimmik ingiaqateqarpat, piniarnermut atatillugu, matumani ooqattaasarneq nakersaanerlu ilanngullugit, imaluunniit timmisueriarluni ooqattaasarnermut atatillugu, aallaasinik aamma pequtinik imm. 1, nr. 2-miit 4 ilanngullugu taaneqartunik nassataqarsinnaavoq imaluunniit atuisinnaavoq.

Imm. 3. Imm. 1-imi aamma 2-mi piumasaqaatit naammassineqarsimanissaat angajoqqaatut oqartussaasup qulakkiissallugu pisussaaffigivaa.

Imm. 4. Imm. 2 malillugu inuup 15-iliisimanngitsup sunngiffimmi aallaaniarsinnaanermut allagartamik atuuttumik peqarnissaa ingiaasup qulakkiissallugu pisussaaffigaa. Aammattaaq ingiaasup inuup 15-ileereersimanngitsup ingerlaavartumik nakkutigineqarnissaa pisussaaffigaa, aamma piniarnerup imaluunniit ooqattaasarnerup naanerani, sakkut pequtillu ingiaasumut tunniunneqarnissaat qulakkiissallugu.«

3. § 2-mi imm. 2-tut ilanngunneqassaaq:

»Imm. 2. § 1 a, imm. 2-mi piumasaqaatit naammassineqarsimanngippata, sakkut pequtillu § 1 a, imm. 1-imi ilaatinneqartut, inunnut 15-ileereersimanngitsunut tunniunneqarnissaat inerteqqutaavoq.«

4. § 3-p kingorna ilanngunneqassaaq:

»§ 3 a. Sakkut pequtillu, inatsimmi matumani ilaatinneqartut susassaqqanngitsunit illersorneqarsinnaasumik aamma tikinneqarsinnaanngitsumik toqqorneqassapput.

Imm. 2. Sakkut aamma imassat il.il. pillugit malittarisassanik erseqqinnerusunik, isumannaatsuunissaq eqqarsaatigalugu pisariaqartinneqartunik, inatsiseqarnermut ministeri aalajangersaasinnaavoq.«

5. § 4, imm. 1--imi, »inuit,« kingorna ilanngunneqassaaq: »15-inik ukioqalereersimasut, aamma«.

6. § 13, imm. 1-imi, »§ 1, imm. 1,«-p kingorna ilanngunneqassaaq: »§ 1 a, imm. 1, 3 aamma 4« aamma § 2-p kingorna ilanngunneqassaaq § 3 a,«.

7. § 13-imi imm. 3-tut ilanngunneqassaaq:

»Imm. 3. Kalaallit Nunaanni eqqartuussisarnermik inatsit malillugu arsaarinnissuteqarnissaq pillugu aalajangiisoqarsinnaavoq. Inatsimmik massuminnga unioqqutitsinermut pinerluttulerinermi inatsimmi malittarisassat malillugit aammattaaq arsaarinninnerit suliarineqarsinnaapput.

§ 2

Inatsit ulloq [XX] atuutilissaaq.

Inatsisissatut siunnersuummut oqaaseqaatit

Oqaaseqaatit nalinginnaasut

Imarisai

1. Aallaqqaasiut	5
2. Inatsisissatut siunnersuummi immikkoortut pingaarnerit	7
2.1. Aallaasinik pequtinillu atuinnissamut ukiutigut angusassap killissarititaasup atulersinneqarnera	7
2.1.1. Inatsisit atuuttut	7
2.1.2. Inatsiseqarnermut ministereqarfiup isumaliutiginninneri aaqqissuussinerlu siunnersuutigineqartoq	11
2.1.2.1. Ukiutigut angusassaq killissaatitaq pillugu piumasaqaatip atulersinneqarnera	11
2.1.2.2. Ingiaqateqarnissamik aaqqissuussinerup eqqunneqarnera	13
2.2. Sakkunik pequtinillu toqqorsineq	16
2.2.1. Inatsisit atuuttut	16
2.2.2. Inatsiseqarnermut ministereqarfiup isumaliutiginninneri aaqqissuussinerlu siunnersuutigineqartoq	17
3. Pisortanut aningaasaqarnikkut kingunissaa aamma atortuulersitsinerlut kingunissaa.....	18
4. Inuussutissarsiornermut il.il. aningaasaqarnikkut allaffissornikkullu kingunissaa.....	18
5. Innuttaasunut allaffissornikkut kingunissaa	18
6. Silaannaap pissusaanut kingunissaa.....	18
7. Avatangiisinut- pinngortitamullu kingunissaa	19
8. EU-mi inatsisitigut tunngassuteqartut	19
9. Oqartussat suleqatigiiffiillu il.il. tusarniaaffigineqartut	19
10. Immersugaq eqikkaaffiusoq.....	20

1. Aallaqqaasiut

Qanittumik aamma aaqqiissutissanik ujaarlernermik sammivilimmik naalakkersuisut Kalaallit Nunaat suleqatigerusuppaat. Taamaammat – nunat taakku akornanni pissutsit assigiinngissutsillu ataqqillugit, ilaatigut Kalaallit Nunaanni qallunaat akisussaaffigalugit suliasaqarfiini tamanut atugassiat Danmarkimi tamanut atugassianik malinninnissaat naalakkersuisut sulissutigaat.

Suliamut tassunga atatillugu Naalakkersuisut kissaateqarneratigut Inatsiseqarnermut ministereqarfiup inatsisissatut siunnersuut manna suliarisimavaa, taannalu inatsisip 1992-imi akuersissutigineqarnerata kingorna Sakkut pillugit Kalaallit Nunaannut inatsisip siullermeerluni annertunerusumik nutarterneqarneranik imaqarpoq.

Sakkut pillugit Kalaallit Nunaannut inatsit atuuttoq aallaasinut immikkut ittumik navianassusilinnut nakkutiginninnissamik aaqquissuussinermik imaqarpoq. Kisianni – aamma meeqqanut – piniarnermut sakkut nalinginnaasut kikkunnilluunniit pissarsiarineqarsinnaapput, matumani timmiarsiutit qoorortuullu ilanngullugit, taamaattoqarneralu kalaallit piniarnermut aamma piniartut kulturianut atatillugu isiginiarneqassaaq.

Aallaasit peqqissaartumik toqqorneqarneq ajornerannut atasumik Kalaallit Nunaanni arlalinnik unammilligassaqartoq, aamma Kalaallit Nunaanni aallartoornernik arlalinnik, meeqqanik, inuusuttunik aamma inersimasunik peqataaffigineqartunik, pisoqartarsimasooq, Kalaallit Nunaanni Politiit paasissutissiissutigisimavaat. Sakkuminnik susassaqaanngitsunit tikinneqarsinnaanngitsumik toqqorsinissamik, aallaasinik piginnittut qulakkeerinnittarsimannginnerannik aallartoernerit amerlanertigut pisarput, soorlu aamma sakkut atorneqarsinnaasut imassa ataatillugit toqqorneqartartut. Taamaattoqarneratalu malitsigisaanik, ingammik meeqqat angerlarsimaffinni imaluunniit umiarsualivinni pinnguarnerninnut atatillugu, sakkunik nassaarsinnaanerisa aarlerinaateqarnera pilersarpoq.

Tamatuma peqatigisaanik imminut toqunnerit imminullu toqoriarnerit pillugit assersuutissanik nassaassaqarpoq, taakkunani aallaasit atorneqartarlutik. Pisut taakku aamma sakkut peqqissaartumik toqqorneqartannginnerannut atassuteqarsinnaapput.

Kalaallit Nunaanni toqqissisimaneq annertusiniarlugu, Sakkut pillugit Kalaallit Nunaannut inatsisip nutarterneqarnissaa pisariaqartinneqartoq,

taamaammat qallunaat naalakkersuisuisa Naalakkersuisullu isumaqatigiissutigaa, aamma nutarterineq Kalaallit Nunaanni pissutsit ataqqillugit, matumani kalaallit piniarnermut aamma aallaaniarnermut kulturiat ilanngullugit, pissasoq isumaqatigiissutigalugu.

Tamanna tunngavigalugu qaqugukkut Kalaallit Nunaanni aallaasinik il.il. aamma aallaasinut imassanik eqqussisoqarsinnaanera, sanasoqarsinnaanera, pissarsisoqarsinnaanera, piginnittoqarsinnaanera, nassataqartoqarsinnaanera imaluunniit atuisoqarsinnaanera pillugit ukiutigut angusassaq killissaatitaasoq ukiunut 15-inut inatsisissatut siunnersuutigineqartup *siullertut* inissippaa. Ukiutigut angusassap killissaatitaasup ukiunut 18-inut killilerlugu aallarnerniarneqannginnerani, Danmarkimisut, aallarnerniarneqannginneranut, kalaallit piniarnermut aallaaniarnermullu kulturiat, aamma taakku piumasaqaatit tamaasa naammassigunikkit, piniagassat killilersugaasut ilaannut Kalaallit Nunaanni meeqqanut 15-iliisimanngitsunut, aamma sunngiffimmi aallaaniarsinnaanermut allagartamik atuuttumik pigisalinnut akuersissummik pisinnaanerat isiginiarneqarpoq. Kalaallit piniarnermut aallaaniarnermullu kulturiat eqqarsaatigalugu, ingiaqateqarnissamik aaqqissuussineq tamatuma peqatigisaanik pilersinneqassasoq siunnersuutigineqarpoq, taamaalilluni, meeraq ingiaqatip inersimasup, inuussutissarsiutigalugu piniarsinnaanermut allagartallip, imaluunniit sunngiffimmi aallaaniarsinnaanermut allagartallip, aamma meeqqamik ingerlaavartumik nakkutiginnittup, ingiaqateqarpat, meeqqat 15-iliisimanngitsut aamma sunngiffimmi aallaaniarsinnaanermut allagartamik atuuttumik pigisallit aallaasinik imassanillu nassataqarsinnaalissapput atuisinnaalerlutillu.

Kissaammernermi imaluunniit qiimmassimaarnermi, matumani aallartoornerit kiisalu toqutsinerit aamma imminoornerit imminooriarnerillu ikilisinneqarnissaat ilanngullugit, sakkut pequtillu il.il. inatsimmi ilaatinneqartut atorneqarsinnaanissaat ajornarnerulersinniarlugu, aallaasit imassallu il.il. toqqorneqartarnissaat pillugit malittarisassanik eqqussisoqarnissaa, inatsisissatut siunnersuutip *aappaattut* siunertaraa.

Inatsisissatut siunnersuummut missingiut, Kalaallit Nunaanni Namminersorlutik Oqartussanut oqaaseqaateqarfigisassatut saqqummiunneqareersoq, eqqaasassaavoq.

2. Inatsisissatut siunnersuummi immikkoortut pingaarnerit

2.1. Aallaasinik pequtinillu atuinissamut ukiutigut angusassap killissarititaasup eqqunneqarnera

2.1.1. Inatsisit atuuttut

Kalaallit Nunaanni immikkut ittumik aallaasinut navianassusilinnut tunngatillugu nakkutilliinissamik aaqqissuussinermik peqarpoq, tamatumalu kingorna – politiinit akuersissummik peqarnani – Sakkut pillugit Kalaallit Nunaannut inatsimmi § 1, imm. 1, imm. 1 malillugu, sakkut taakku eqqunneqarnissaat, sananeqarnissaat, pissarsiarineqarnissaat, pigineqarnissaat, nassatarineqarnissaat imaluunniit atorneqarnissaat inerteqqaavaq. Taamaattoq nakkutilliinissamik aaqqissuussineq Kalaallit Nunaannut inatsimmi § 12 malillugu Kalaallit Nunaanni inuit sakkutuujunngitsut pillugit naalagaaffimmi oqartussaasunut ilaatinneqanngilaq.

Aallaasit nalinginnaasumik sakkutut pequtitut pingaaruteqartut, nukimmik naammattumik annertussusilimmik akunik mattusuunik – ilisaqqunnartumik aqerlunik – igeriussisinnaasutut nassuiarneqarsinnaasut, inatsisissatut siunnersuummi nr. L 36-imi, 7. oktober 1992-imeersumi (Folketingstidende 1992-93, ilanngussaq A-mi, allaaserisap inissaani 898-imi) takuneqarsinnaavoq.

Sakkut, nakkutilliinissamik aaqqissuussinermi ilaatinneqartut, tassaapput illuinnarsuutit assigiinngitsut aamma illuinnarsuutit naatsut kiisalu aallaasit arlalissuarnik aalajangersimasunillu amerlassusilinnik imaqarsinnaasut (hel- aamma automatiskiusut) eqqaataasinnaasut, matumani timmiarsiutit qooroqanngitsunik (manissunik) sullullit/savissallit halvautomatiskiusut, patruuninik marlunnit amerlanerusunik imaqarsinnaasut. Aammattaaq eqqarasuartaatit (maskinpistoler) aamma eqqarasuartaatit (maskingevær-it) uani pineqarput.

Sakkunut nakkutilliinissamik aaqqissuussinermi ilaasunut – politiinit akuersissummik peqaqqaarani – eqquassinissaq, sananissaq, pissarsinissaq, nassataqarnissaq imaluunniit savissaannik (pibe-nik), kanngiffiinik (låsestole-nik), makisartuinik (bundstykke-inik) aamma niaquusaannik (baskyler-inik) atuinissaq aammattaaq inerteqqaavaq.

Imassanik, sakkunut nakkutilliinissamik aaqqissuussinermi ilaasunik – politiinit akuersissummik peqaqqaarani – eqquassinissaq, sananissaq, pissarsinissaq, nassataqarnissaq imaluunniit atuinissaq, matumani patruunit puunik, ikittaatinik (tændskrue-nik), qaartartuinik (fænghætte-inik), kukuttaataannik aqerlussaanillu (brændrør-inik aamma projektil-inik) ilanngullugit, aammattaaq inerteqqutaavoq.

Piniarnermi sakkut, matumani timmiarsiutit nalinginnaasut aamma qoorortuut ilanngullugit, kisianni sakkut pillugit Kalaallit Nunaannut inatsimmi nakkutilliinissamik aaqqissuussinermi ilaanngillat. Tamanna aamma aallaaseeqqanut (luft- og fjederbøsser-nut) atuuppoq. Sakkunik taamaattunik pissarsisinnaaneq taamaalilluni killeqanngilaq – aamma meeqqanut.

Sakkut ilaasa inerteqqutaanerat pillugu Kalaallit Nunaannut nalunaarummi nr. 1010-mi, 28. oktober 2009-imeersumi inatsisip nakkutilliinissamik aaqqissuussinera annertusineqarpoq. Nakkutilliinissamik aaqqissuussinermi qaartartut miloriuttakkat, qaartartut, qaartartut nunamut assaanneqartartut sakkullu assingusut, nakkutilliinissamik aaqqissuussinermi aamma ilaatinneqartut, nalunaarutip, Sakkut pillugit Kalaallit Nunaannut inatsimmi § 1, imm. 3-mi oqaaseqatigiit siulliit, aamma § 13 malillugit atulersinneqartup, malitsigaa. Sakkut kemiskiusut, uumassuseqartutigut pinnguutinit sanaajusut, qinngornerit atorlugit saassussinissamut sanaajusut aamma atomit nukinginit sanaajusut aamma sakkunik igeriussissutit, kiisalu sakkuni taamaattuni, sakkunik igeriussissutini atorineqartussatut immikkut ittumik ilusilersugaasut aamma imaluunniit naleqqussagaasut, aammattaaq nakkutilliinissamik aaqqissuussinermi ilaatinneqarput. Laser-it atorlugit sakkuliat ilaat, sakkut kalerrisaarutaasut aamma sakkut gas-itaqaatigalutik kalerrisaarutaasut (paassaannarnik aqerlortaqaanngitsunik imassallit), kalerrisaarinnermi qummoroortitsissutinik aamma ajunaalernermi ikumatitanik igitsinissamut taamaallaat sanaajunngitsut.

Inuussutissarsiutigalugu piniarnermut aallaasit halvautomatiskiusut, savissat, kanngiffiit, makisartut aamma inuussutissarsiutigalugu piniarnermut aallaasit halvautomatiskiusut niaquusaat kiisalu sakkunut taakkununga imassat, matumani patruunit puui, ikittaatit, qaartartui, kukuttaataat aqerlussaasallu ilanngullugit, Sakkut pillugit Kalaallit Nunaannut inatsimmi aallaasit inerteqqummit pineqaanngitsut pillugit nalunaarutikkut nr. 949-imeersukkut, 10. december 1993-imeersukkut,

Sakkut pillugit Kalaallit Nunaannut inatsimmi § 3, oqaaseqatigiit aappata malitsigisaanik atulersinneqartukkut, inuit inuussutissarsiutigalugu piniarnissamut akuersisummik peqartut (inuussutissarsiutigalugu piniarsinnaanermut allagartaq), kiisalu meeqqat 16-it inorlugit ukiullit akuersisummik taamaattumik pillit, nakkutilliinissamik aaqqissuussinermi ilaatinneqanngillat.

Naggataagut Sakkut pillugit Kalaallit Nunaannut inatsimmi imassat/pequtissat inerteqqummit pineqanngitsut pillugit nalunaarutikkut nr. 604-kkut, 1. august 1998-imeersukkut Sakkut pillugit Kalaallit Nunaannut inatsimmi § 1, imm. 3-imi oqaaseqatigiit kingulliit malitsigisaanik atulersinneqartukkut, imassat/pequtissat arlallit assigiinngitsunik suussusillit inatsisip nakkutilliinissamik aaqqissuussineranit ilaatinneqanngillat.

Sakkut pillugit Kalaallit Nunaannut inatsimmi § 2 malillugu, pissarsisup imaluunniit tiguisup akuersissut pisariaqartinneqartoq qimerloortissinnaanngippagu, pequtit atortussiallu nakkutilliinissamik aaqqissuussinermi ilaatinneqartut tunniunneqarnissaat imaluunniit piginnittuunerup allanut tunniunneqarnissaa inerteqqutaavoq. Inatsisissatut siunnersuummi nr. L 36-imi, 7. oktober 1992-imeersumi (Folketingstidende 1992-93-imi, ilanngussaq A-mi, allaaserisap inissaani 900) malillugu aallaasinik allakkerivikkut nassiunneqartussanngorlugit tuniniaaneq aalajangersakkap pisinnaatinngilaa.

Sakkut pillugit Kalaallit Nunaannut inatsimmi § 4 malillugu akuersisummik tunisineq taamaallaat inunnut, inuttut atugarisamikkut maannamullu qanoq inooriaaseqarnerat pillugit paasissutissat pigineqartut tunngavigalugit akuerisaanissamut nangaanartoqartinneqanngitsunut, Sakkut pillugit Kalaallit Nunaannut inatsit malillugu akuersissuteqartoqarsinnaavoq.

Inuup inuttut atugarisai maannamullu qanoq inooriaaseqarnera pillugit paasissutissat pigineqartut tunngavigalugit akuerisaanissamut nangaanartoqartinneqannginnersut pillugit, pineqartup sakkumik pigisaqarnera nakkutilliinissamik aaqqissuussinermi ilaatinneqarnera pillugu naliliineq missiliuinerusumik tunngaveqartoq, aamma Kalaallit Nunaanni pissutsit naliliinermi ilaatinneqartussaasut, inatsisissatut siunnersuummi nr. L 36-imi, 7. oktober 1992-imeersumi (Folketingstidende

1992-93-imi, ilanngussaq A-mi, allaaserisap inissaani 900-901-imi) takuneqarsinnaavoq.

Sakkup atornerlunneqarnissaa tunngavissalimmik aarlerinaateqarpat, sakkunik peqarsinnaanermut akuersissut itigartitsissutigineqassaaq. Aallaasinik mianersuaatsumik atuisimaneq immikkut ittunik paasinarsisinneqarpat, tamanna aamma atuuppoq. Pisuni sakkup atornerlunneqarnissaa pillugu pissutissalimmik nalornisoqartillugu, aallaaviusoq tassaassaaq, sakkunik piginninnissamut akuersissutip itigartitsissutigineqarnera. Pinerluttulerinermik suliat naammassineqareersimasut, pasilliinerit maannakkut pisut kiisalu qinnuteqartup inuttut atugarisai taamaalillutik itigartitsinermut tunngavilersuutaasinnaapput.

Sakkut pillugit Kalaallit Nunaannut inatsit malillugu akuersissutini pisinnaanissamut ukiutigut angusassaq killissaatitaq pillugu piumasaqaat atuutinnilaq, kisianni piaaraluni imaluunniit mianersuaalliorluni meeqqamut 12-it inorlugit ukiulimmut imaluunniit tarnimigut nappaatilimmut, eqqarsartaatsikkut kinguarsimasumut imaluunniit aalakoortumut sakkumik, qaartartumik imaluunniit navianartunik allanik tunniussaartoq, navianartumik illersorneqarsinnaanngitsumik iliuuseqartutut pinerluttulerinermi inatsimmi § 90, imm. 1 malillugu eqqartuunneqassaaq.

Siusinnerusukkut Kalaallit Nunaanni pinerluttulerinermi inatsimmi (inatsimmi nr. 55, 5. marts 1954-imeersumi) § 64, imm. 1 aalajangersakkap assigigaa, aalajangersakkamut piareersaataasumik suliat malitsigaat (Folketingstidende 2007-08 (katersat aappaat), ilanngussaq A, qupperneq 1661).

Aalajangersagaq tunngaviusumik pillaasarnermik inatsimmi § 254-p assigaa, siusinnerusukkut pinerluttulerinermi inatsimmi § 64, imm. 1-imut piareersaataasumik suliani takuneqarsinnaavoq, tassani ukiutigut angusassaq killissaatitaq taamaattoq ukiunut 15-inut inissinneqarsimalluni. Kalaallit Nunaanni ukiutigut angusassaq killissaatitaq tassaavoq ukiut 12-it, tassami piffissami pinerluttulerinermi inatsimmi aalajangersakkap inissinneqarfiani tassani, Folketingstidende 1953-54, ilanngussaq A, allaaserisap inissaa 385 malillugu, Kalaallit Nunaanni piffinni amerlasuuni, nukappiaqqat 10-iniit 11-linnut ukiullit piniarnermi peqataasarnarat nalinginnaasuummat.

Aalajangersakkap ajutoornerit pitsaaliorneqarnissaat anguniaraa, pillasarnermik inatsimmi § 254-imut piareersaataasumik suliani takuneqarsinnaavoq. Oqaatsimi »tunniussineq«-mi taamaammat taamaallaat pisoq, tassani meeraq pissusissamisoortumik nakkutigineqannginnera pineqarpoq (Straffelovskommission-ip isumaliutissiissutaa 1912-imeersoq, § 373, imm. 2, pissutaasut, qupperneq 311).

2.1.2. Inatsiseqarnermut ministereqarfiup isumaliutiginninneri aaqqissuussinerlu siunnersuutigineqartoq

2.1.2.1. Ukiutigut angusassaq killissaatitaaq pillugu piumasaqaatip atulersinneqarnera

Qallunaat sakkut pillugit inatsisiliorneranni sakkut pillugit inatsimmi pequtit ilaatinneqartut akuersissummik peqqaarani pissarsiarineqarsinnaanerisa nalinginnaasumik inerteqqutigineqarnera atuuppoq. Sakkut pillugit inatsimmi § 2-mi oqaaseqatigiit aappaat malillugu, sakkunut pequtitut sulit allanut, inunnut 18-it inorlugit ukiulinnut inerteqquteqarneq annertusineqarpoq, tamatumalu peqatigisaanik sakkut imassallu il.il. pillugit kaajallaasitaaq nr. 10222, 1. december 2016-imeersoq, kingusinnerpaamik kaajallaasitaakkut nr. 9579-ikkut, 6. juli 2023-imeersukkut allangortinneqartoq malillugu, sakkut pillugit inatsimmi § 2, imm. 1 malillugu inuit 16-init inorlugit ukiullit akuersissummik pissarsisinnaanngilluinnarput.

Meeqqat aallaasinik atuisinnaasussaanninnerat pissusissamisoortumik aallaaviusutut Inatsiseqarnermut ministereqarfiup isigaa. Kisianni Kalaallit Nunaannut tunngatillugu, kalaallit piniarnermut aallaaniarnermullu kulturiat pillugit immikkut pissutsit eqqarsaatigineqassapput.

Inatsiseqarnermut ministereqarfik Naalakkersuisullu 2018-imi ataatsimeeqatigiipput, tassanilu sakkut pillugit Kalaallit Nunaannut inatsisip naammattumik aamma ullutsinnut naleqquttumik ajutoornernut pinerluttuliornernullu, aallaasinik atuiffiusunut, illersuutaanersoq pillugu oqallinnissaq siunertaralugu sullissisut attuumassuteqartut qaaqquneqarput.

Sakkut pillugit Kalaallit Nunaanni inatsisiliornermi ukiutigut angusassaq killissaatitaaq nalinginnaasumik ukiunut 16-inut inissinneqarnissaa, piffissami taamanikkut pisumi Kalaallit Nunaanni ineriartornermut aamma

kalaallit piniarnermut aallaaniarnermullu kulturiannut naapertuutissasoq, ataatsimeeqatigiinnermi pingaarnertut isumaqatigiissutigineqarpoq. Ilaatigut tamanna tunngavigalugu sakkut pillugit inatsisip allanngortinneqarnissaanut siunnersuut Inatsiseqarnermut ministereqarfiup suliarisimavaa, tassani ukiutigut angusassaq killissaatitaq ukiunut 16-inut inissinneqarluni, taannali naammassineqanngilaq.

Inatsisissatut siunnersuut manna inatsisissatut siunnersuummit 2019-imeersumit aallaavilerlugu suliarineqarpoq, taamaattorli piffissami pisut akornanniittumi Inatsisartut inatsisiliaat atuutilersinneqartut ilanngunneqarput.

Piniarneq aallaaniarnerlu pillugit Inatsisartut inatsisaat nr. 34, 13. juni 2023-imeersoq ulloq 1. juli 2023 Kalaallit Nunaannut atuutilerpoq. Inatsisikkut ukiutigut angusassaq killissaatitaq ukiunut 15-inut inissinneqarnera atulersinneqarpoq, taamaalluni inunnut 15-ileereersimasunut piniagassanut killersugaasunut aallaaniarsinnaanermut akuersissut taamaallaat tunniunneqarsinnaalluni. Inunnut 12-inik ukioqalereersimasunut, piniagassanut killilersugaanngitsunut sunngiffimmi aallaaniarsinnaanermut allagartap pissarsiarineqarsinnaanera inatsisikkut suli periarfissaavoq – taamaattoq pineqartup, 12-it 15-illu akornanni ukioqartup, meeqqap angajoqqaavinit, angajoqqaatut akisussaatitaasumit imaluunniit inummik 18-it sinnerlugit ukiulimmit nammineersinnaassusilimmik ingiaqateqarnissaa piumasaqaataavoq.

Sakkut pillugit Kalaallit Nunaannut inatsit malillugu siunissami akuersissutit taamaallaat inunnut 15-ileereersimasunut tunniunneqarsinnaasussaasut, tamanna tunngavigalugu siunnersuutigineqarpoq. Sakkut pillugit Kalaallit Nunaannut inatsit malillugu qaqugukkut akuersissummik pissarsisoqarsinnaaneranut piumasaqaatit allanngortinneqarnissaat, tamatuma saniatigut anguniarneqanngilaq.

Inuit 15-ileereersimasut aallaasinik kiisalu pequtininik, aallaasitut isikkulinnik aamma sananeqarnermik imaluunniit atortussat atorneqartut malitsigisaannik taamaattunngorlugit sanaqqinneqarsinnaasunik kiisalu aallaasinut aallaasit savissaannik, silussaataannik aamma makisartuinik, niaquusaannik aamma imassaannik, matumani patruunit puui, ikittaataat, qaartartui, kukuttaataat aqerlussallu/ilulissaallu ilanngullugit, inatsimmi § 1, imm. 1 malillugu ilaatinneqartunik sakkunik imaluunniit pequtininik,

sakkunik allanik eqqussisinnaanerat, sanasinnaanerat, pissarsisinnaanerat, pigisaqarsinnaanerit, nassataqarsinnaanerit imaluunniit atuisinnaanerit, inerteqqutaassasoq aammattaaq siunnersuutigineqarpoq.

Inatsimmi piumasaqaataasut naammassineqarsimappata, inunnut 15-ileereersimasunut pequtunik taaneqartunik eqqussinissaq, sananissaq, pissarsinissaq, nassataqarnissaq imaluunniit savissaannik, kanngiffiit, makisartunik aamma niaquusaannik atuinissaq sulii periarfissaassaaq.

Tassunga atatillugu oqaaseq »aallaaseq« sakkutut nassarneqarsinnaasutut savissalittut, igitsisinnaasutut, igitsisinnaasutut sananeqartutut imaluunniit ingerlatitsissut ikuallassaq ikiorsiullugu ajornanngitsumik amerlasumik, aqerlunik imaluunniit projektilimik igitsisinnaanngorlugu allanngortinneqarsinnaasutut paasineqartussaassaaq.

Aallaasit saniatigut, pequtit taamaattutut isikkullit, aamma taamaattunngorlugit sananeqarsinnaasut, inerteqquteqarnissamik siunnersuummi aamma ilaatinneqartussaapput.

Sakku tamarmiulluni, aallaasip eqqua minillugu, sinaamigut sipineqarnermigut atorsinnaajunnaartinneqartoq, aalajangersagassatut siunnersuutigineqartumi taamaalilluni ilaatinneqassanngilaq, tassami taakku aallaasitut isigineqanngimmata. Sakkup ima atorsinnaajunnaartinneqarnera, eqqarnermut atorneqarsinnaanani imaluunniit allanngortillugu sananeqarnermigut taamatut atorneqaqqissinnaanani, tamatumunnga tunngaviuvoq.

Inatsisit malillugit sakkut ilaanik, aallaasit atornissaannut pingaaruteqartutut isigineqartunik, pigisaqarnermi, ukiutigut angusassap killissaatitap avaqqunneqannginnissaa qulakkeerniarlugu, savissat, kanngiffiit, makisartut aamma sakkunut taakkununga niaquusat inerteqquteqarnermi ilaatinneqartussaassanngitsut siunnersuutigineqarpoq.

2.1.2.2. Ingiaqateqarnissamik aaqquissuussinerup atulersinneqarnera

Kalaallit Nunaanni piniarnermut ileqqut ingerlatiinnarneqarnissaasa qulakkeerneqarnissaat siunertarlugu, ukiutigut angusassamut killissaatitamut piumasaqaat ingiaqateqarnissamik aaqquissuussinermik ilaneqassasoq siunnersuutigineqarpoq.

Inuit 15-ileereersimanngitsut, aallaaniarsinnaanermut akuersissummik atuuttumik pigisaqartut, pineqartoq nakkutilliisumik inuk naleqquttumik ingiaqateqarpat, aallaaniarnermut, matumani oqattaasarneq aamma nakersaaneq ilanngullugit, imaluunniit oqattaasarnermut atatillugu aallaasimik nassataqarsinnaassasoq aamma atuisinnaasoq siunnersuutigineqarpoq. Ingiaqataasoq 18-ileereersimassasoq aamma inuussutissarsiutigalugu piniarsinnaanermut allagartamik imaluunniit sunngiffimmi aallaaniarsinnaanermut allagartamik atuuttumik pigisaqassasoq, aammattaaq siunnersuutigineqarpoq.

Ingiaqataasup naleqquttuunissaa siunnersuutigineqarpoq. Pineqartoq aalakoorneq, napparsimaneq, sanngiillisimaneq, qasoruloorneq, sinimmik amigaateqarneq, qiimmassimaarnartunik imaluunniit puuallassimaarnartunik assigisaannilluunniit sunnerneqarneq pissutigalugit ima pissuseqarpat, taanna aarlerinangitsumik aallaasinik isumaginnissinnaanngippat, inuk ingiaqatitut naleqquttuusussaassanngilaq.

Tamatuma kingorna aaqqissuussineq tassaassaaq, inuk 15-iliisimanngitsaq, piniarnermi timmisueriarluni oqattaasarnermiluunniit peqataappat, tamatigut inersimasup aallaasinik akisussaasuusup peqataanissaa.

Kalaallit piniarnermut aallaaniarnermullu kulturiat aaqqissuussinissatut siunnertuutigineqartumi eqqarsaatigineqarpoq, aamma tamatuma peqatigisaanik inunnut 15-ileereersimanngitsunut, piniarnermi peqataasunut naleqqiullugu, pissutsit toqqissisimaffiusut pilersinneqarput, tassami taakku ingiaqataasumik nammineersinnaassusilimmik nakkutigineqassapput, taassumalu nammineerluni piniarsinnaanissaa aamma, meeqqap sakkumik illersorneqarsinnaasumik isumaginninnissaata qulakkeerniarlugu, naammattumik oqaasissaqarluartuunissaa naatsorsuutigineqartariaqarpoq.

Ingiaqateqarnermik aaqqissuussinissatut siunnersuutigineqartumi aammattaaq timersuut oqattaasarneq ilaatinneqarpoq, timersuullu inunnit 15-ileereersimanngitsunut aamma timersuutigineqarsinnaavoq. Danmarkimi, sakkut imassallu il.il. pillugit nalunaarummi nr. 2531-imi, 20. december 2021-imeersumi malittarisassat malillugit, inuit 16-it inorlugit ukiullit taamaallaat oqattaasarnermut ilitersuisoq ilagalugu oqattaasarsinnaasut, Kalaallit Nunaanni, oqattaasarnermut ilitersuisut akuerineqartarnissaannik aaqqissuussinermik atuiiffunngitsumi, inuit 15-ileereersimanngitsunut, sunngiffimmi aallaaniarsinnaanermut

akuersissummik atuuttumik pigisaqartut, naleqquttumik ingiaqateqarluni ooqattaasarsinnaanerit siunnersuutigineqarpoq.

Inuup 15-inik ukioqalereersimanngitsup ingerlaavartumik ingiaqatip eqqaaniinnissaanik, aamma ingiaqatip ingerlaavartumik, inuup, 15-ileereersimanngitsup qanoq iliorneranik nakkutilliinissaanik pisariaqarpallu akuliunnissaanik, nakkutilliinissamik pisussaaffiup kingunerissavaa. Inuup 15-inik ukioqalereersimanngitsup aallaaseq pisariaqartinneqartumik mianersorluni isumagissagaa aamma sakku pinnguarilissanngikkaa, tassunga atatillugu ingiaqatip ingerlaavartumik qulakkeertussaassavaa.

Sakkut pequtillu, inummit 15-ileereersimanngitsumit, tigummiarneqartut, piniarnerup imaluunniit timmisueriarluni ooqattaasarnep naanerani, ingiaqataasumut tunniunneqarnissaat, ingiaqataasup qulakkiissallugu aammattaaq pisussaaffigissussaassavaa.

Ingiaqatip pisussaaffini eqqortinngippagu, pineqaatissiissutit aallartinneqarsinnaassasut siunnersuutigineqarpoq.

Inuup 15-ileereersimanngitsup ingiaqammik, ingiaqataanissamut piumasagaatinik naammassinnittumik, ingiaqateqarnani piniariarsimaneranut imaluunniit ooqattaasariarsimaneranut, angajoqqaatut oqartussaasoq mianersuaalliortutut akisussaatinneqarsinnaappat, angajoqqaatut oqartussaasumut pineqaatissiissutit aallartinneqarsinnaassasut, aammattaaq siunnersuutigineqarpoq.

Tamanna aallaaniarnermut imaluunniit timmisueriarluni ooqattaasarnermut atanngitsumik aallaaseq tunniunneqarpat imaluunniit inummit 15-ileereersimanngitsumut tunniunneqarpat, pineqaatissiinerit aallartinneqarsinnaassasut, naggataagut siunnersuutigineqarpoq.

Inunnut 15-it inorlugit ukiulinnut pinerluttulerinermi inatsit malillugu pineqaatissiissuteqarsinnaaneq, inatsisissatut siunnersuutip kingunerinngilaa. Tassunga atatillugu pinerluttulerinermi inatsimmi § 16 innersuussutigineqarpoq. Kisianni taama tulleriillutik, Kalaallit Nunaanni eqqartuussisarnermik inatsimmi aamma Kalaallit Nunaanni pinerluttulerinermi inatsimmi malittarisassat malillugit arsaarinnissuteqartoqarsinnaassaaq.

Inatsisissatut siunnersuummi § 1, nr. 2-imiit 3 ilanngullugu aamma 5-miit 7 ilanngullugu, kiisalu taakkununga oqaaseqaatit innersuussutigineqarput.

2.2. Sakkunik pequtinillu toqqorsineq

2.2.1. Inatsisit atuuttut

Aallaasit imassallu toqqorneqarnissaat pillugit Sakkut pillugit Kalaallit Nunaanut inatsimmi nalinginnaasumik malittarisassanik aalajangersaasoqanngilaq.

Sakkut pillugit Kalaallit Nunaannut inatsimmi § 6 malillugu kisianni politiit § 1 malillugu, isumannaatsuunissaq eqqarsaatigalugu pisariaqartinneqartutut isumaqarfigineqartunik, toqqorsinissaq aamma atuisinnaaneq pillugit piumasaqaatinik taamaattunik akuersissuteqarsinnaapput.

Toqqorsinissamut piumasaqaatinik, qallunaat taamanikkut sakkut pillugit nalunaarutaanni § 13-imut (massakkut § 24, imm. 1 atuuttoq) assingusunik, Kalaallit Nunaanni pissutsit pissutigalugit allanngortinneqartunik, politimesteri aalajangersakkanik aalajangersaassasoq, aalajangersakkamut piareersaataasumik suliani (Folketingstidende 1992-93-imi, ilanngussaq A-mi, allaaserisap inissani 901-imi) takuneqarsinnaavoq. Sakkup illersorneqarsinnaasumik toqqorneqassaaq aamma sapinggisamik sumiiffimmi susassaqaanngitsunit tikiinneqarsinnaanngitsumi toqqorneqarnissaa pillugit piumasaqaatinik aalajangersaasoqassasoq, tamatuma kinguneraa. Aallaasit, isumannaatsumi toqqorneqaanngitsut, toqqorsivimmiluunniit parnaaqqasumi toqqorneqaanngitsut, ima toqqorneqassapput, aallaasip parnaarsaataa imaluunniit makisartui peerneqassallutik aamma paarnaarneqarsinnaasumi inissinneqassallutik. Naggataagut imassat immikkoortillugit toqqorsivimmi parnaaqqasumi toqqorneqartussaannerat pillugit piumasaqaatinik aalajangersaasoqarpoq.

Sakkut pillugit Kalaallit Nunaannut inatsimmi malittarisassat, politiit inuiaqatigiinni tamat torersumiinnerannik isumannaarinerat pillugu aammalu inuit ataasiakkaat aamma inuiaqatigiinni tamat isumannaassusaannik il.il. illersuinerat pillugu, kiisalu politiit pineqaatissiissutaagallartunik atuutilersitsisinnaannerat pillugu Kalaallit Nunaannut nalunaarummi (tamattorersumiinnerat pillugu nalunaarummi) §

12, imm. 4-kkut ilaneqarput, tamatumalu kingorna sumiiffinni najugaqarfiusuniit kiisalu aqqusernernerit, illulianit aamma eqqaavissuarnit, najugaqarfiusut avataanniittunit, 500 miiteri tikillugu ungasitsigisumi aallaasit imarneqartassapput.

2.2.2. Inatsiseqarnermut ministereqarfiup isumaliutiginninneri aaqqissuussinerlu siunnersuutigineqartoq

Kalaallit Nunaanni arlalinnik aallartoortoqartarsimaneranut, meeqqanik peqataasoqarfiusunik, sakkunik peqqissaanngitsumik toqqorsisarneq pissutaasut ilagigaat, Kalaallit Nunaanni Politiit nalilerpaat. Aammattaaq tamanna pillugu imm. 1-imi qulaani allaaserineqartumi erseqqinnerusumik allanneqartut malillugit, sakkut peqqissaanngitsumik toqqorneqartarnerisa, assersuutigalugu inuit immينوornissamik navianartorsiortut soorlu aamma inuit kissaammersimaartut aalakoortulluunniit, najugaqarfiusut iluini aallaasersornissamut ussernartumiitinneqalernissaannut annertunerusumik aarlerinartorsiortitsineq taamaattoqarnerata kingunerisinnaavaa. Taamaammat sakkunut suussutsinut tamarmik imassallu, inatsimmi ilaatinneqartut, toqqorneqartarnissaannut piumasaqaatit minnerpaaffissaannik eqqussisoqartariaqarpoq.

Minnerpaaffissatut piumasaqaatit siunnersuutigineqartut piumasaqaatinit Danmarkimi atuuttunit aallaaveqarsinnaanngillat, tamatumalu kingorna aallaasit imassat sikaavimmi qularnaarsakkami, sikaaviusami toqqorsivimmi il.il., aamma sakkut suuneri apeqqutaatillugit immikkut ittumik toqqorneqarnissaannut piumasaqaatit atuutinneqarlutik, tassami malittarisassat Kalaallit Nunaanni tamarmi – matumani illuni inissianilu minnerusuni – atorneqartussat uani pineqartussaapput.

Sakkut pequtillu tamanik suussusillit, inatsimmi ilaatinneqartut tamarmik illersorneqarsinnaasumik aamma susassaqaanngitsunit tikiinneqarsinnaanngitsumi toqqorneqassasut, tamanna tunngavigalugu siunnersuutigineqarpoq. Piginnittup/piginnittut peqataaffiginngisaanik sakkup imaaliallaannaq tiguneqarsinnaannginnissaa aamma atorneqarsinnaannginnissaa tamatuma kinguneraa. Aallaasit imassanit immikkoortillugit toqqorneqassasut, assersuutigalugu imassat amusartumi imaluunniit ineeqqami immikkoortumi aallaasimit immikkoortillugit toqqorneqarnissaat tamatuma siunnersuutip kinguneraa.

Sakkut erseqqinnerusumik qanoq ililluni tikiinneqarsinnaannginnissaat uani pingaarnerpaassanngilaq. Sakkup sakkuusivimmi akuerisaasumi iikkanut

naternullu bolterlugu aalajangersakkamut toqqorneqarnissaa, taamaalilluni piumasaqaataassanngilaq. Kisianni assersuutigalugu taamaallaat makisartuisa peerneqarnerat aamma qoorortuup taskianut ilineqarnerat naammannaviannngilaq. Tassunga taarsiullugu arlaatigut paarnaarneqarsinnaasumik, sakkup akuinik illersorneqarsinnaasumik immikkoortitsisinnaasumik toqqorsiveqartoqassaaq.

Sakkut imassallu il.il. toqqorneqarnissaat pillugit, inatsiseqarnermut ministeri malittarisassanik, isumannaatsuunissaq eqqarsaatigalugu piumasaqaataasunik, aalajangersaasinnaasoq aammattaaq siunnersuutigineqarpoq.

Inatsisissatut siunnersuummi § 1, nr. 4, tassungalu oqaaseqaatit innersuussutigineqarput.

3. Pisortanut aningaasaqarnikkut kingunissaa aamma atortuulersitsinermut kingunissaa

Politiinut unnerluussisussaataitaasunullu inatsisissatut siunnersuut aningaasaqarnikkut kinguneqarnaviannngitsoq nalilerneqarpoq. [Eqqartuussivinnut aningaasaqarnikkut kingunissaa maannakkuugallartumik naliliineq malillugu killeqassapput, kisianni inatsisissatut siunnersuutip saqqummiunneqarnissaata tungaanut qulaajarneqassapput].

Pisortanut aningaasaqarnikkut atortuulersitsinermulluunniit tunngasunik inatsisissatut siunnersuut malitseqassanngilaq.

4. Inuussutissarsiornermut il.il. aningaasaqarnikkut allaffissornikkullu kingunissaa

Inuussutissarsiornermut aningaasaqarnikkut allaffissornikkullu inatsisissatut siunnersuut kinguneqassanngilaq.

5. Innuttaasunut allaffissornikkut kingunissaa

Innuttaasunut inatsisissatut siunnersuut allaffissornikkut kinguneqassanngilaq.

6. Silaannaap pissusaanut kingunissaa

Inatsisissatut siunnersuut silaannaap pissusaanut kinguneqanngilaq.

7. Avatangiisit- pinngortitarlu pillugit kingunissaa

Inatsisissatut siunnersuut avatangiisit pinngortitamullu pillugit kinguneqassanngilaq.

8. EU-mi inatsisitigut tunngassuteqartut

Inatsisissatut siunnersuut EU-mi inatsisitigut tunngasunik isiginnifinnik imaqqanngilaq.

9. Oqartussaasut suleqatigiiffillu il.il. tusarniaaffigineqartut

Inatsisissatut siunnersuummut missingiut piffissami ulloq 2. Juli 2024-imit ulloq 30. juli 2024-imut oqartussaasunut suliniaqatigiiffinnut il.il. tulluuttunut nassiullugu tusarniutigineqarpoq:

Advokatrådet, Amnesty International, Avannaata Kommunia, Danmarks Våbenhandlerforening, Danske Advokater, Den Danske Dommerforening, Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq, Det Kriminalpræventive Råd, Direktoratet for Kriminalforsorgen, Dommerfuldmægtigforeningen, Domstolsstyrelsen, Foreningen af Advokatfuldmægtige, Foreningen af Offentlige Anklagere, Foreningen af Statsadvokater, Kalaallit Nunaanni Illersuisut peqatigiiffiat, Fængselsforbundet, Godthaab Jagtforening, Sulisitsisut, Kalaallit Nunaanni Aalisarsinnaanermut Akuersissutinik Nakkutilliisoqarfik (KANUAANA), Nunatta Eqqartuussisuuneqarfia, Grønlands Politiforening, Inuit Pisinnaatitaaffii pillugit Siunnersuisoqatigiit, Nunatsinni Advokatit, Institut for Menneskerettigheder, Justitia, Kommune Qeqertalik, Kommuneqarfik Sermersooq, Kommune Kujalleq, Eqqartuussisut peqatigiiffiat, Kalaallit Nunaanni Pinerluttunik Isumaginnittut, Landsforeningen af Forsvarsadvokater, Landsforeningen KRIM, Landsforeningen SIND, Nunatta Illersuisuunera, Meeqqat Inuusuttullu Oqaloqatiginnittarfiat (MIO) – Børnetalesmanden, Nunatsinni Advokatit, Orsiivik ApS, PiSiu (Kalaallit Nunaanni Pitsaaliuinermit Siunnersuisoqatigiit), Politiforbundet i Danmark, Psykiatrifonden, Qalut Vónin A/S, Retspolitisk Forening, Nunatsinni Eqqartuussivik, Rigsadvokati, Rigspolitiit, Kalaallit Nunaanni Aalisartut Piniartullu Kattuffiat (KNAPK), Tapertaralugu Aalisartut

Piniartullu Kattuffiat (TPAK), Østre Landsret, Vestre Landsret aamma Qeqqata Kommunia.

Ullup 22. august 2024-ip tungaanut tusarniaanerup ingerlanneqarsimannginnera eqqaaneqassaaq. Tamanna, inatsisissatut siunnersuutip Kalaallit Nunaanni Namminersorlutik Oqartussanut saqqummiunneqartussaananik peqquteqarpoq.

Tamatuma saniatigut inatsisissatut siunnersuummut missingiut Kalaallit Nunaanni Namminersorlutik Oqartussanut oqaaseqarfigeqqullugu saqqummiunneqarpoq.

10. Immersugaq eqikkaaffiusoq

	Pitsaasumik sunniutissai/aningaasa rtuutikinnerunerit (angeruit, annertussusaa allaguk/Naaggaaruit allaguk »Soqanngilaq«)	Ajortumik sunniutissai/aningaasa rtuu- teqarnerunissaq (angeruit, annertussusaa allaguk/Naaggaaruit
Naalagaaffimmut, kommuninut nunallu immikkoortuinut aningaasaqarnikkut kinguneri	Soqanngilaq	Politiinut unnerluussisussaait aasunullu inatsisissatut siunnersuut aningaasaqarnikkut kinguneqarnavianng itsoq nalilernerqarpoq. [Eqqartuussivinnut aningaasaqarnikkut kingunissaa maannakkuugallartu mik naliliineq malillugu killeqassapput, kisianni inatsisissatut siunnersuutip

		saqqummiunneqarni ssaata tungaanut qulaajarneqassapput]. Nunap immikkoortuinut imaluunniit kommuninut aningaasaqarnikkut atortuulersitsinermul luunniit tunngasunik inatsisissatut siunnersuut malitseqassanngilaq.
Naalagaaffimmut, kommuninut nunallu immikkoortuinut atuutilersitsinerup kinguneri	Soqanngilaq	Soqanngilaq.
Inuussutissarsiortunut aningaasaqarnikkut kinguneri	Soqanngilaq	Soqanngilaq.
Inuussutissarsiortunut allaffissornikkut kinguneri	Soqanngilaq	Soqanngilaq
Innuttaasunut allaffissornikkut kingunissaa	Soqanngilaq.	Soqanngilaq.
Avatangiisit pillugit kingunissaa	Soqanngilaq.	Soqanngilaq.
EU-mi inatsisitigut tunngassuteqartut	Inatsisissatut siunnersuut EU-mi inatsisitigut tunngasunik isiginniffinnik imaqanngilaq.	
EU-mi inuussutissarsiornermut sammititamik malittarisassiornermi tunngaviusut tallimaasut atortuulersinneqarnissaannut akerliuvoq/EU-mi	Aap	Naagga X

malittarisassiuinermi minnerpaamik piumasaqaatinik qaangiivoq (X-ileruk)		
---	--	--

*Inatsisissatut siunnersuummi aalajangersakkanut ataasiakkaanut
oqaaseqaatit*

§ 1-imut

Nr. 1-imut

Sakkut pillugit Kalaallit Nunaannut inatsimmi § 1, imm. 1 malillugu politiinit akuersissummik peqqaarnani aallaasinik eqquassinissaq, sananissaq, pissarsinissaq, pigisaqarnissaq imaluunniit illuinnarsuutunik aamma illuinnarsuutunik naatsunik tigummisarissanik allanik, aallaasinik arlalissuarnik aalajangersimasumillu amerlassusilinnik imaqarsinnaasutut eqqaataasinnaasunik, matumani timmiarsiutit qooroqanngitsunik (manissunik) sullullit/savissallit halvautomatiskiusut, patronenik amerlasuulinnik marluinnaanngitsunik imaqarsinnaasut, eqqarasuartaatinik (maskinpistol-inik), eqqarasuartaatinik (maskingevær-inik), savissanik, kanngiffinnik, makisartunik aamma niaquusaanik (baskyler-inik), sakkunut nr. 1-imiit 4 ilanngullugu taaneqartut ataanniittunik, taakkualu ataanni patronit puui, ikittaatinik, qaartartuinik, kukuttaataannik aamma aqerlussaannik atuinissaq inerteqqutaavoq.

Oqaatsip ”sanianissaq” ima allanngortinneqassasoq ”sananissaq” § 1, imm. 1-imi siunnersuutigineqarpoq.

Oqaatsitigut allanngineq uani pineqarpoq, taamaaliornerullu ulluminut naleqquttumik oqaatsip imarisaanik ”sananissaq”-mik atuinissaq siunertaraa.

Nr. 2-mut

Kalaallit Nunaanni qaqugukkut aallaasinik il.il. aallaasinullu imassanik eqquassinissaq, sananissaq, pissarsinissaq, piginninnissaq, tigummiarnissaq imaluunniit atuinissaq pillugit ukiutigut angusassamik killissaatitaasumik atuuttoqanngilaq.

Sakkunik kiisalu pequtunik, § 1, imm. 1-imi ilaatinneqartunit aallaasinik pequtinillu allaanerusunik, eqquassinissaq, sananissaq, pissarsinissaq, peqarnissaq, nassataqarnissaq imaluunniit atuinissaq, inunnut 15-ileereersimanngitsunut inerteqqutaasoq, § 1 a, imm. 1-imi siunnersuutigineqarpoq, matumani pequtit, aallaasitut isikkoqartut aamma sananeqarnertik imaluunniit atortussaq atorneqarsimasoq malillugu taamaattunngorlugit sananeqarsinnaasut ilanngullugit, sakkunut imm. 2-mi taaneqartunut savissat, kanngiffiit aamma niaquusat, aamma aallaasinut, imm. 2-mi taaneqartunut imassat, matumani patronit imaqanngitsut, ikittaataatit, qaartartui, kukuttaataat aamma aqerlut ilanngullugit, taamaattoq imm. 2 takuuk.

Imm. 2-mi piumasaqaatit naammassineqarsimanngippata, inunnit 15-ileereersimanngitsunit aallaasit pequtinillu § 1, imm. 1-imi ilaatinneqartut eqqunneqarnissaat, sananeqarnissaat, pissarsiarineqarnissaat, pigineqarnissaat, nassatarineqarnissaat imaluunniit atorneqarnissaat inerteqqutaassasoq, imm. 1, nr. 1-imi aalajangersagassatut siunnersuutip kingunerissavaa. Sakkut § 1, imm. 1, nr. 1-imiit 6 ilanngullugu allatorneqarsimasut aalajangersagassatut siunnersuutigineqartumi ilaatinneqassapput, matumani illuinnarsuutit, aallaasillu naatsut tigummissassiat, aallaasit arlalissuarnik aalajangersimasumillu amerlassusilinnik imaqarsinnaasutut eqqaataasinnaasut kiisalu taakkununga imassat ilanngullugit.

Imm. 2-mi piumasaqaatit naammassineqarsimanngippata, aallaasinik pequtinillu, § 1, imm. 1-imi ilaatinneqartunit allaanerusunik, eqquassinissaq, sananissaq, pissarsinissaq, peqarnissaq, nassataqarnissaq imaluunniit atuinissaq, inunnut 15-ileereersimanngitsunut inerteqqutaassasoq, imm. 1, nr. 2-tut siunnersuutigineqartup kingunerissavaa, matumani pequtit, aallaasitut isikkoqartut aamma sananeqarnertik imaluunniit atortussaq atorneqarsimasoq malillugu taamaattunngorlugit sananeqarsinnaasut ilanngullugit.

Imm. 1, nr. 2-imi oqaaseq »aallaasit«, sakkutut suugaluartutulluunniit nassatarineqarsinnaasutut sullui/savissaat igeriussisinnaasutut, ingerlatsissut ikuallajasoq atorlugu igeriussisinnaasussatut sananeqartutut imaluunniit amerlasuunik, aqerlumik imaluunniit projektilimik igeriussisinnaanissamut ajornanngitsumik allanngortinneqarsinnaasutut paasineqassaaq.

Taamaalilluni sakkut kalerrisaarutaasut aamma sakkut gas-itaqaatigalutik kalerrisaarutaasut (paassaannarnik aqerlortaqaanngitsunik imassallit), allanngortillugit saqqinneqarsinnaanngitsut, aqerlumik projektilimilluuniit igeriussinani, sunniineri taamaallaat nipimik imaluunniit qaammaallatitsinermik pilersitsisartut, aalajangersakkatut siunnersuutigineqartumi ilaatinneqanngillat.

Sakku tamarmiulluni, aallaasip eqqua minillugu, sinaamigut sipineqarnermigut atorsinnaajunnaartinneqartoq, inatsimmi taamaattut aallaasit isigineqanngimmata, aalajangersagassatut siunnersuutigineqartumi aamma ilaatinneqassanngillat. Sakkup aallaaniassutigalugu imaluunniit sananeqarnerata allanngortinneqarneratigut taamatut atorneqarsinnaasunngorlugu atorsinnaajunnaarsinneqarnera, tassunga tunngaviuvoq.

Nalornisoqartillugu, pequtit aallaasit isikkullit aamma piviusumik taamaattunngorlugit allanngortinneqarsinnaanerat aamma piviusumik taamaattunngorlugu allanngortinneqarsinnaanera pingaartinneqassaaq. Inerteqqummi kisianni sakkut piviusuunngitsut, imaappoq aallaasinik assiliinerit, ilaatinneqanngillat.

Sakkunut, imm. 1, nr. 2-itut siunnersuutigineqartumi taaneqartunut, savissat, silussaait aamma makisartut, inerteqqutigineqartussatut siunnersuutigineqartumi ilaatinneqarnissaat aalajangersakkap *imm. 1, nr. 3-ani* siunnersuutigineqarpoq. Akut, tamarmik immikkut aallaasip atorneqarsinnaaneranut pingaaruteqartutut isigineqartut, uani pineqarput.

Sakkunut, imm. 1, nr. 2-mi taaneqartunut imassat, matumani aamma patruunit puui, ikittaait, qaartartui, kukuttaait aqerlussallu ilanngullugit, inerteqqutigineqartussatut siunnersuutigineqartumi ilaatinneqassatut, *imm. 1, nr. 4-tut* siunnersuutigineqartup kingunerissavaa.

Imassanik sananermi komponentit atorneqartussatut assersuutigineqartut aalajangersakkap taasai tamakkiisuunngillat.

Aalajangersakkap imm. 1 apeqqutaatinagu, inuk, 15-ileereersimanngitsoq, aamma sunngiffimmi aallaaniarsinnaanermut allagartamik atuuttumik peqartoq, inuk naleqquttumik 18-ileereersimasumik aamma inuussutissarsiutigalugu piniarsinnaanermut imaluunniit sunngiffimmi aallaaniarsinnaanermut allagartamik atuuttumik pigisaqartumik

ingiaqateqarpat, piniarnermut atatillugu, matumani ooqattaasarneq aamma nakersaaneq, imaluunniit timmisueriarluni ooqattaasarneq ilanngullugit, aallaasinik pequtinillu imm. 1, nr. 2-miit 4 ilanngullugu taaneqartunik, nassataqarsinnaasoq imaluunniit atuisinnaasoq, § 1 a, imm. 2-mi siunnersuutigineqarpoq.

Pineqartoq naleqquttumik ingiaqateqarpat, inuk 15-iliisimanngitsaq, aamma sunngiffimmi aallaaniarsinnaanermut allagartamik atuuttumik pigisaqartoq, piniarnermut, matumani ooqattaasarnermut aamma nakersaanermut, timmisueriarluni ooqattaasarnermulluunniit atatillugu, aallaasinik taakkunungalugu imassanik nassatarinnissinnaasoq imaluunniit atuisinnaasoq aalajangersagassatut siunnersuutigineqartup kingunerissavaa.

Ingiaqataasup naleqquttuusariaqarnera siunnersuutigineqarpoq. Pineqartoq aalakoorneq, napparsimaneq, sanngiillisimaneq, qasoruloorneq, sinimmik amigaateqarneq, qiimmassimaarnartunik imaluunniit puuallassimaarnartunik assigisaannilluunniit sunnerneqarneq pissutigalugit ima pissuseqarpat, taanna aarlerinangitsumik aallaasinik isumaginnissinnaanani, inuk ingiaqatitut naleqquttuunavianngilaq.

Ingiaqataasooq aammattaaq 18-ileereersimassasoq aamma inuussutissarsiutigalugu piniarnermut allagartamik imaluunniit sunngiffimmi aallaaniarsinnaanermut allagartamik atuuttumik pigisaqartariaqassasoq siunnersuutigineqarpoq. Kisianni ingiaqataasup inuullu 15-ileereersimanngitsup akornanni atassuteqaateqarnissaq piumasqaataassanngilaq, kisiannili aalajangersakkamut pingaarnertut atornerqarfiusussaq tassaassasoq angajoqqaat, meeqqaminnik piniariaqateqartut imaluunniit ooqattaasariaqateqartut, naatsorsuutigineqarpoq.

Ingiaqateqarnissamik aaqqissuussinissatut siunnersuutigineqartoq piniarnermut sammisaqarnermut attuumassuteqartunut taamaallaat atornerqassaaq, matumani ilanngullugit aallaammik nakersarlugu ooqattaasaarnermi, sungiusarluni ooqattaasaarnermi imaluunniit piniagassanik killilersugaanngitsunik piniavinnermi, kiisalu ooqattaasaarnermut atatillugu. Inuup 15-ileereersimanngitsup aallaat atuiffimmut atuiffimmilluunniit assartuinnermi tigummiarpagu, assartuineq atuiffimmiit inuttaatalu najugaqarfianut toqqaannaq pissaaq. Aqqutaanilu unigani aamma allamut sangusoqassanngilaq.

Imm. 1-imi aamma 2-mi piumasaqaatit naammassineqarsimanissaat angajoqqaatut oqartussaassuseqartup pisussaaffigigaa, § 1 a, imm. 3-mi siunnersuutigineqarpoq.

Meeqqammi imm. 1 malillugu aallaasimik inerteqqutaasumik pigisaqannginnissaa, aamma meeqqap aallaasimik ingiaqateqarnissamik aaqqissuussinermi ilaatinneqartumik tigummiarnissani imaluunniit atuinissani kissaatigippagu, meeqqap aammattaaq imm. 2 malillugu piumasaqaatinik naammassinnittumik ingiaqateqarnissaa, angajoqqaatut oqartussaassuseqartup taamaalilluni misissortussaassavaa.

Inatsisissatut siunnersuummi § 1, nr. 6 (§ 13, imm. 1) malillugu angajoqqaatut oqartussaassuseqartup pisussaaffimminik unioqqutitsinera, pinerluttulerinermi inatsisip malitsigisaanik pineqaatissiissutaasinnaassasoq, inatsisissatut siunnersuutikkut aallartinniarneqarpoq.

Inuk 15-ileereersimanngitsoq piniariarpat imaluunniit ooqattaasariarpat, tassungalu atatillugu ingiaqateqarani aallaasinik imassanillu tigummiarpat atuippalluunniit, angajoqqaatut oqartussaasumut pineqaatissiinernik aallartitsisoqarsinnaasussaasoq, tamatuma kingunerissavaa. Pisuni taamaattuni assersuutigalugu taakku inuup 15-ileereersimanngitsup piniariarnissaminut imaluunniit ooqattaasariarnissaminut piareersarnera takusimagamikku, meeqqami ingiaqateqarani piniariarneranut imaluunniit ooqattaasariarneranut angajoqqaatut oqartussaasut mianersuaalliortutut akisussaatinneqarsinnaanerat piumasaqaataassaaq.

Inuup 15-ileereersimanngitsup inuussutissarsiutigalugu- imaluunniit sunngiffimmi aallaaniarsinnaanermut allagartamik atuuttumik peqarani, 18-iliisimanngitsumik ingiaqateqarluni, imaluunniit sunngiffimmi aallaaniarsinnaanermut allagartamik atuuttumik peqarani piniariarsimaneranut imaluunniit ooqattaasariarsimaneranut, angajoqqaatut oqartussaasut mianersuaalliortutut akisussaatinneqarsinnaappata, taamatuttaaq angajoqqaatut oqartussaasumut pineqaatissiissutit aallartinneqarsinnaassapput. Ingiaqataasup 18-ileereersimanera aamma inuussutissarsiutigalugu piniarsinnaanermut allagartamik- imaluunniit sunngiffimmi aallaaniarsinnaanermut allagartamik atuuttumik peqarnersoq qulakkiissallugu angajoqqaatut oqartussaasup naleqquttumik ilungersuutigisimaneraa, assersuutigalugu ingiaqataasup najugaata

uppernarsaataanik imaluunniit originaliusumik kinaassutsimut
uppernarsaammik assitalimmik aamma inuussutissarsiutigalugu
piniarsinnaanermut- imaluunniit sunngiffimmi aallaaniarsinnaanermut
allagartamik atuuttumik peqarnersoq pillugu takusisimanerat, pisup
nalilersorneqarnerani pingaartinneqartussaassaaq.

Angajoqqaatut oqartussaasup ingiaqataasup naleqquttuunnginnera
nalunngikkunikku imaluunniit nalunngittariaqarunikku, angajoqqaatut
oqartussaasumut pineqaatissiissutit aallartinneqarsinnaassasut aammattaaq
siunnersuutigineqarpoq. Inuk, aalakoornerup, napparsimanerup,
nukillaanganerup, qasusoornerup, sinimmik amigaateqarnerup,
qiimmassimaarutitik imaluunniit ilisimajunnaarnartunik
assigisaannillunniit sunnerneqarnerup pissutigisaanik ima qanoq
issuseqarpat, taassuma aallaasit toqqissisimanartumik passussinnaanagit,
inuk ingiaqatitut naleqquttuusussaassanngilaq.

Imm. 2 malillugu, inuup 15-ileereersimanngitsup, sunngiffimmi
aallaaniarsinnaanermut allagartamik atuuttumik peqarnerata
qulakkeerneqarnissaa, ingiaqataasup pisussaaffigigaa, § 1 a, imm. 4-mi
siunnersuutigineqarpoq. Inuup 15-ileereersimanngitsup ingerlaavartumik
nakkutigineqarnissaa, aamma piniarnerup timmisuarniarluni
ooqattaasernerullunniit naanerani sakkut pequtillu ingiaqataasumut
tunniunneqarnissaat, aammattaaq ingiaqataasup pisussaaffigaa.

Inummik 15-ileereersimanngitsumik ingiaqataasup ingerlaavartumik
nakkutilliinissaa, aalajangersagassatut siunnersuutigineqartup
kingunerissavaa.

Inuup 15-ileereersimanngitsup aallaasip pisariaqartinneqartumik
mianersortumik isumagineqarnissaa aamma taassuma aallaasimik
pinngualinnginnissaa, taamaalilluni ingiaqataasup qulakkeertussaassavaa.

Ingiaqataasup qaqugukkullunniit inuup 15-ileereersimanngitsup
eqqaaniinnissaa, ingiaqataasup nakkutilliinissamik pisussaaffiata siullertut
kinguneraa. Ingiaqataasoq naammattumik qanissuseqassasoq, taamaalilluni
inuup 15-ileereersimanngitsup, sulerinera ingiaqataasup
takusinnaassallugu, aamma inuk 15-ileereersimanngitsaq aallaammik
peqummillunniit illersorneqarsinnaanngitsumik isumaginnippat,
pisariaqartillugu akuliussinnaanissaa, tamatuma kinguneraa.

Ingiaqataasoq inummut 15-ileereersimanngitsumut naammattumik qanissuseqarnersoq pillugu naliliinermi, ingiaqataasup inummik 15-ileereersimanngitsumik qanoq ungasitsigisinnaaneranut, silap pissusaa aamma inerisimassuseq aamma sakkunik isumaginnissinnaanermik misilittakkat ilaatigut pingaartinneqarsinnaassapput.

Ingiaqataasup inummik 15-ileereersimanngitsumik ingerlaavartumik nakkutiginninnissaa, ingiaqataasup nakkutilliinissamik pisussaaffiata aappaattut kingunerissavaa. Taamaalilluni assersuutigalugu ingiaqataasoq nammineq piniarnerminik ima ulapputeqartigissanngilaq, ingiaqataasoq piviusumik inummik 15-ileereersimanngitsumik nakkutiginnissinnaanani aamma taamaalilluni tassunga akuliunnissaq ingiaqataasumut periarfissaanani. Tamatuma saniatigut inuup 15-ileereersimanngitsup aallaasimik nassatarinninnerani imaluunniit atuinerani, nammineerluni timmisuarniarluni ooqataasassanngilaq assigisaanilluunniit suliaqassanani.

Inuk 15-ileereersimanngitsup – ingiaqataasup pineqartumik ilitsersuineramik misiliigaluarnerrata akerlianik – pisariaqartinneqartumik mianersorluni sakkumik isumaginninngippat, assersuutigalugu sakkumik pinnguaateqarnermigut, inummik 15-ileereersimanngitsumik naveersinissani, imaluunniit allatut pineqartumut akuliunnissani ingiaqataasup pisussaaffigaa, matumani pissutsit assigiinngitsut malillugit, inuup 15-ileereersimanngitsup sakkumik tunniussinissaanik misiliineq ilanngullugu.

Taassuma piumasaqarnera malillugu inuk 15-ileereersimanngitsup nammineerluni aallaasimik ingiaqataasumut tunniussiumanngippat, ingiaqataasup pineqartoq pinngitsaalillugu sakkuanik arsaarinninniaaissaanik tamanna kinguneqanngilaq. Pisuni taamaattuni kisianni ingiaqataasoq piaarnerpaamik politiinik attaveqartariaqarpoq tamannalu pillugu ilisimatitsilluni.

Sakkut pequtillu, inummit 15-ileereersimanngitsumit tigummiarneqartut, piniarnerup imaluunniit timmisuarniarluni ooqattaasarnrup naanerani, ingiaasumut tunniunneqarnissaat qulakkiissallugu ingiaasup aammattaaq pisussaaffigaa. Taamaammat sakku piniarnerup imaluunniit timmisuarniarluni ooqattaasarnrup naanerani ingiaqataasumut tunniunneqarpat imaluunniit inuup 15-ileereersimanngitsup aallaasimik ingiaqataasumut tunniussiumannginnera ingiaqataasup politiinut nalunaarutigippagu, ingiaqataasup pisussaaffii aatsaat atorunnaassapput.

Paasissutissiinissamik pisussaaffimminik ingiaqataasoq
naammassinninngippat, § 1, nr. 6 malillugu pineqaatissiineq
aallartinneqarsinnaassaaq.

Aammattaaq inatsisissatut siunnersuummi § 1, nr. 6-imut aamma 7-imut
oqaaseqaatit kiisalu inatsisissatut siunnersuummut nalinginnaasumik
oqaaseqaatini imm. 2.1.2.1 aamma 2.1.2.2 innersuussutigineqarput.

Nr. 3-mut

Pissarsisoq imaluunniit tiguisoq pisariaqartinneqartumik akuersisummik
takutitsinngippat, sakkut pillugit Kalaallit Nunaannut inatsimmi § 2
malillugu, pequtinik inatsimmi § 1-imi nakkutilliinissamik
aaqqissuussinermi ilaatinneqartunik, unniussinissaq imaluunniit
piginnittuunerup allanut tunniunneqarnissaa inerteqqutaavoq.

§ 1 a, imm. 2 naammassineqarsimanngippat, inunnut 15-
ileereersimanngitsunut aalaasinik pequtinillu § 1 a, imm. 1-imi
ilaatinneqartunik tunniussinissaq inerteqqutaasoq, § 2, imm. 2-mi
siunnersuutigineqarpoq.

Pisunut ingiaqateqarnissamik aaqqissuussinerup avataaniittunut, tassani
inuk siunertaqarluni aallaasinik imaluunniit pequtinik § 1 a, imm. 1-imi
ilaatinneqartunik, inummut 15-ileereersimanngitsumut tunniussinerani,
imaluunniit assersuutigalugu aallaasit pequtillu taamaattut sumiiffinni inuit
15-ileereersimanngitsut ingerlaarfigisaanni tamanut takusassanngorlugit
ilinerisigut ilatsiinnartutut tunniussinerani, aalajangersagassatut
siunnersuutigineqartoq sammitinneqarpoq.

Inummut, sakkumik imaluunniit peqummik inummut 15-
ileereersimanngitsumut tunniussisimasumut, assersuutigalugu pineqartup,
pissarsisoq imaluunniit tiguisoq 15-ileereersimasoq
qulakkeersimanngippagu, inatsimmi § 13, imm. 1 malillugu
pineqaatissiineq aallartinneqarsinnaasoq, aalajangersagassatut
siunnersuutigineqartup kingunerissavaa.

Tunniussisoq inuttut pisariaqartinneqartumik uppersaammik, matumani
najuqaqarnermut uppersaat imaluunniit originaliusumik kinaassutsimut

uppernarsaat assitalik ilanngullugit, noqqaassuteqarsimanngippat, tamanna assersuussutigalugu pisinnaavoq.

Pissutsit malillugit, pinerluttulerinermik inatsimmi § 90, imm. 1-i aporfineqartillugu, pineqaatissiisoqarsinnaavoq.

Aammattaaq inatsisissatut siunnersuummi oqaaseqaatini nalinginnaasuni imm. 2.1.2.1 innersuussutigineqarpoq.

Nr. 4-mut

Isumannaallisaaneq eqqarsaatigalugu pisariaqartinneqartut isigineqartariaqartuni, sakkut pillugit Kalaallit Nunaannut inatsimmi § 1 malillugu akuersissummi, toqqorsineq atuisinnaanerlu pillugit sakkut pillugit Kalaallit Nunaannut inatsimmi § 6 malillugu, piumasaqaatinik taamaattunik politiit aalajangersaasinnaapput.

Susassaqanngitsunut sapinngisamik tikinneqarsinnaanngitsuni saku illersorneqarsinnaasumik toqqorneqassasoq pillugu, piumasaqaatinik aalajangersaasoqarsinnaavoq. Aallaasinut, isumannaatsumi toqqorneqarsimanngitsunut, toqqorsivimmiluunniit parnaaqqasumi toqqorneqarsimanngitsunut, aallaasip parnaarsaataa imaluunniit makisartui peerneqassasut aamma paarnaarneqarsinnaasumi inissinneqassasut pillugit piumasaqaatinik aalajangersaasoqarsinnaavoq. Aammattaaq imassat immikkoortillugit toqqorsivimmi parnaaqqasumi toqqorneqartussaanerat pillugit piumasaqaatinik aalajangersaasoqarsinnaavoq.

Taassuma saniatigut sakkut toqqorneqarnissaat pillugit sakkut pillugit Kalaallit Nunaannut inatsit piumasaqaatinik imaqaanngilaq. Taamaammat sakkut pillugit Kalaallit Nunaannut inatsimmi § 1 malillugu sakkunut immikkut navianassusilinnut akuersissummi aalajangersimasumi tamanna aalajangersarneqarsimappat, sakkut toqqorneqarnissaat pillugit taamaallaat piumasaqaatit atuupput.

Sakkut pequtillu, inatsimmi matumani ilaatinneqartut, illersorneqarsinnaasumik aamma susassaqanngitsunit tikinneqarsinnaajunnaarlugit toqqorneqassasut, § 3 a, imm. 1-imi siunnersuutigineqarpoq.

Sakkut pequtillu, § 1, imm. 1 malillugu sakkunut immikkut ittumik navianassusilinnut nakkutilliinissamik aaqqissuussinermi ilaatinneqartut aamma sakkunut pequtinullu § 1 a, imm. 1 malillugu inerteqqutigineqartussatut siunnersuutigineqartuni ilaatinneqartut, aalajangersakkami ilaatinneqassapput. Sakkut, § 1, imm. 3-mi oqaaseqatigiit siulliit malillugit nalunaarutini atulersinneqartuni nakkutilliinissamik aaqqissuussinermi ilaatinneqartut, aammattaaq aalajangersakkami ilaatinneqassapput.

Sakkup imassanut immikkoortillugu toqqorneqarnissaa, assersuutigalugu imassat amusartumi imaluunniit ineeqqami aallaasimit immikkoortillugit toqqorneqarnissaat, sakkup »illersorneqarsinnaasumik toqqorneqarnissaata« kingunerissavaa.

Sakkup tigusariaannaassussaannginnera aamma piginnittup/piginittut peqataatinagit atorneqarsinnaassussaannginnera, susassaqanngitsunit »sakkup tикиnneqarsinnaannginnissaata« kingunerissavaa. Sakkup qanoq ililluni tикиnneqarsinnaanngitsunngortinnissaa pingaarnerpaajussanngilaq. Taamaalilluni sakkup tикиnneqarsinnaanngitsumi toqqorneqarneratigut imaluunniit allakkut akuerisaanngitsumik atorneqarsinnaannginnissaanut qulakkeerneqarneratigut piumasaqaat naammassineqarsinnaassaaq. Assersuutigalugu sakku imaluunniit makisartoq sikaavimmi qajannaatsumi amusartumiluunniit nalinginnaasumi parnaarunneqarsinnaassaaq, sakku sakkup nusuttaataanut parnaarsaatilerneqarsinnaavoq imaluunniit sakku pequtinut aalajangersakkanut kalunnilerlugu tiguneqarsinnaajunnaarsinneqarsinnaavoq. Sakkunik piginnittut arlallit sakkuminnik ataatsimoorlutik toqqorsinerat aamma pingaarnerpaajussanngilaq. Taarsiulluguli tillinniap imaluunniit inuup susassaqanngitsup sakkumik atorneqarsinnaasumik akornuserneqarnani atuisinnaannginnissaa pingaarnerussaaq.

Sakkut imassallu il.il. toqqorneqartarnissaat, isumannaatsuunissaq eqqarsaatigalugu pisariaqartinneqartut, pillugit inatsiseqarnermut ministeri malittarisassanik erseqqinnerusunik aalajangersaasinnaanera, § 3 a, imm. 2-mi siunnersuutigineqarpoq. Kalaallit Nunaanni namminersorlutik oqartussat inatsisaani nr. 473 12. Juni 2009-meersoq § 18 malillugu naatsorsuutigineqarpoq, maleruagassat taamaattut naalakkersuisut oqaloqatigalugit aalajangersarneqassasut.

Sakkut imassallu il.il. toqqorneqartarnissaat pillugit malittarisassanik erseqqinnerusunik inatsiseqarnermut ministeri aalajangersaasinnaassasoq, aalajangersagassatut siunnersuutigineqartup kingunerissavaa.

Imm. 2-tut siunnersuutigineqartoq malillugu nalinginnaasunik piumasaqaatit aalajangersarneqarsinnaasut ilassutaattut, sakkut pillugit Kalaallit Nunaanni inatsimmi § 6 malillugu, § 1 malillugu akuersissutini toqqorsinissaq atuisinnaanerlu pillugit piumasaqaatinik piviusunik Kalaallit Nunaanni Politiit sulii aalajangersaasinnaannissaat, aalajangersagassatut siunnersuutip allanngortissanngilaa.

Kalaallit Nunaani politiit pisuni piviusuni § 1 malillugu akuersissutini aalajangersaasinnaanerannik sukannernerusunik, pequtitut § 1 a, imm. 1-imi inerteqquteqarnermi ilaatinneqartunut, politiit malittarisassanik sukannernerusunik aalajangersaasinnaannnginnerat, tassunga atatillugu naatsorsuutigineqarpoq.

Sakkup sakkuusivimmi akuerisaasumi iikkanut naternullu bolterlugu aalajangersakkamut toqqorneqarnissaa pillugu aalajangersaasoqannginnissaa aammattaaq naatsorsuutigineqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.2.2 innersuussutigineqarpoq.

Nr. 5-imut

Sakkut pillugit Kalaallit Nunaannut inatsimmi sakkut § 4-imi malillugu inatsit malillugu akuersissutit taamaallaat inunnit, inuttut atugarisaat aamma maannamut inuunerminni ingerlatsinerat pillugit paasissusissanik nangaanartoqartitsilersunik peqanngitsunit qinnuteqaataasut akuersissutigineqarsinnaapput.

Inuit 15-iliisimanngitsut sakkut pillugit Kalaallit Nunaannut inatsimmi § 1-imi inerteqquteqarnermi pequtiniq eqqussinissamut, sananissamut, pissarsinissamut, pigisaqarnissamut, nassatarinninnissamut imaluunniit atuinissamut akuersissummik nalunaaruteqarfigineqannginnissaat, § 4, imm. 1-imi siunnersuutigineqarpoq.

§ 1 a, imm. 1-imi nr. 1-imi inerteqquteqarnissamik aalajangersagassatut siunnersuutigineqartup aalajangersagassatut siunnersuummut atatillugu

isiginiarneqartussaassaaq, tamatumalu kingorna inunnut 15-iliineqanngitsunut sakkunik pequtinillu § 1, imm. 1-imi ilaatinneqartunik eqquassinissaq, sananissaq, pissarsinissaq, pigisaqarnissaq, tigumminissaq imaluunniit atuinissaq inerteqqutaavoq.

Aammattaaq inatsisissatut siunnersuummi § 1, nr. 2-imut oqaaseqaatit, aamma inatsisissatut siunnersuummut nalinginnaasunik oqaaseqaatini imm. 2.1.2.1 innersuussutigineqarput.

Nr. 6-imut

Sakkut pillugit Kalaallit Nunaannut inatsimmi § 13 malillugu sakkut pillugit inatsisip inerteqquteqarneq aamma peqqussuteqarneq pillugit aalajangersagartai, Kalaallit Nunaanni pinerluttulerinermi inatsit malillugu pineqaatissinneqarnermik iliuusereriikkanut kinguneqartitsissutaapput.

Kalaallit Nunaanni pinerluttulerinermut inatsimmi § 16 malillugu meeqqap 15-it inorlugit ukiullip iliuuserisai pinerluttulerinermut inatsit tunngavigalugu pineqaatissinneqarsinnaanngilaq.

§ 1 a, imm. 1-imut, 3-mut 4-mullu, kiisalu § 3 a-tut siunnersuutigineqartumi aalajangersakkamut innersuussummik ilanngussisoqarnissaa *imm. 1-imi* siunnersuutigineqarpoq.

Inerteqqutigineqartussatut siunnersuutigineqartoq unioqqutinneqarpat, pinerluttulerineq pillugu inatsiseqartitsineq malillugu akisussaatisisoqarsinnaasoq, § 1 a, imm. 1-imut innersuussinerup kingunerissavaa.

§ 1 a, imm. 1 malillugu inerteqquteqarnermi inuit 15-iliisimanngitsunut ilaatinneqartussaammata, pinerluttulerinermi inatsimmi § 16 malillugu inunnut taakkununga kisianni pineqaatissiinermik iliuusereriikkanut kinguneqartitsisoqarsinnaassanngilaq.

Tamatuma akerlianik, inunnut 15-ileereersimasunut aammalu kajumissaarinikkut, siunnersuinikkut imaluunniit sapiitsuliornikkut inatsimmik unioqqutitsinermut peqataasimasunut, § 1 a, imm. 1-imi inerteqqutigineqartussatut siunnersuutigineqartumik unioqqutitsinermut, pissutsit malillugit, pinerluttulerinermik inatsimmi § 13 malillugu peqataanermut akisussaatisisoqarsinnaassaaq.

Aammattaaq aaqqissuussineq inatsisissatut siunnersuutikkut aallarniiniartoqarpoq, tamatumalu kingorna inuk 15-iliisimanngitsoq piniariarpat, matumani oqattaasarneq nakersaanerlu ilanngullugit, imaluunniit timmisueriarluni oqattaasariarpat, tamatigut inersimasumik sakkup isumagineqarneranut akisussaasuusumik peqataasoqassaaq.

Taamaalilluni inuk 15-iliisimanngitsoq piniariarpat imaluunniit timmisueriarluni oqattaasariarpat, angajoqqaatut oqartussaasup naleqquttumik ingiaqateqartoqarnissaa, aamma ingiaqataasup, piniarnermut imaluunniit timmisuarniarluni oqattaasarnermut atatillugu pisussaaffimi eqqortinneqarnissaat akisussaaffigisussaassavaa.

Angajoqqaatut akisussaasuusooq imaluunniit ingiaqataasooq inatsit malillugu pisussaamminik unioqqutitsinermini pinerluttulerineq pillugu inatsiseqartitsineq malillugu akisussaatinneqarsinnaavoq, § 1 a, imm. 2-tut aamma 3-tut siunnersuutigineqartumut innersuussinissatut siunnersuutigineqartup kinguneraa. Tassunga atatillugu inatsisissatut siunnersuummi § 1, nr. 2-mut (§ 1 a, imm. 3-mut aamma 4-imut) oqaaseqaatit innersuussutigineqarput.

Sakkut pillugit inatsimmi § 1 a, imm. 3 aamma 4 aamma pinerluttulerinermi inatsimmi § 90, imm. 1 ataatsimoortillugit pissutsit assigiinngitsut malillugit pineqaatissiisoqarsinnaassaaq.

Sakkut toqqorneqarnissaat pillugit inatsisissatut siunnersuummi § 1, nr. 3 malillugu, sakkut pillugit Kalaallit Nunaannut inatsimmi § 3 a-mi aalajangersagassatut siunnersuutigineqartup unioqqutinneqarnera, Kalaallit Nunaanni pinerluttulerinermi inatsit malillugu pineqaatissinneqarnermik iliuusereriikkanut kinguneqartitsissutaasinnaanissaa, naggataagut aalajangersagassatut siunnersuutigineqartup kinguneraa.

§ 1, nr. 1-mmit 3 ilanngullugu oqaaseqaatit, aamma nalinginnaasumik oqaaseqaatini imm. 2.1.2. innersuussutigineqarput.

Nr. 7-imut

Sakkut pillugit Kalaallit Nunaannut inatsimmi § 13 malillugu, sakkut pillugit inatsimmi inerteqquteqarnerit aamma peqqussuteqarnerit pillugit aalajangersakkat, Kalaallit Nunaanni pinerluttulerinermi inatsit malillugu

iliuusereriikkanut kingunerititsinermi aallaaviatigut
pineqaatissiissutaasarput.

Kalaallit Nunaanni pinerluttulerinermi inatsimmi § 16 malillugu, iliuutsit meeqqanit 15-it inorlugit ukiulinnit iliuuserineqartut, pinerluttulerinermi inatsit malillugu pineqaatissinneqarnernik kinguneqarsinnaanngillat.

Arsaarinnittarneq pillugu malittarisassat erseqqinnerusut eqqartuussisarnermik inatsimmi kapitali 37-imi aalajangersarneqarput. Akuliunnerup suliarineqarsinnaaneranut piumasaqaatit suut siullertut naammassineqassanersut, eqqartuussisarnermik inatsimmi arsaarinnittarneq pillugu aalajangersakkat malittarisassiuuppaat. Taamaalilluni ilaatigut pinerluttuliornep suussusaa aamma pasitsaassinerup sakkortussusaa, akuliunnerup suliarineqarsinnaaneranut apeqqutaavoq. Tamatuma saniatigut paasinarsititsinissamut piumasaqaatit nalinginnaasumik naammassineqarsimassapput, taamaalilluni pinngitsaaliinikkut akuliunnerup atornissaanut piviusumik pisariaqartitsineq piussalluni.

Pinerluttulerinermi inatsimmi kapitali 37-imi arsaarinnittarneq pillugu malittarisassat erseqqinnerusut aalajangersarneqarput. Arsaarinnittarneq pillugu kapitali 37 tassaavoq pinerluuteqarnermi inatsimmik malitseqartitsinerup allaneruneranik takussutissiisoq. Arsaarinninneq pillugu malittarisassat pineqaatissiinertut isigineqannginnerat tamatuma kinguneraa, taamaattoqarneratalu taakku meeqqanut 15-it inorlugit ukiulinnut atorneqarsinnaanerat sunniutigaa.

Kalaallit Nunaanni eqqartuussisarnermik inatsimmi malittarisassat malillugit arsaarinninnissaq pillugu aalajangiisoqarsinnaasoq, § 13, *imm. 3-mi* siunnersuutigineqarpoq. Inatsisip massuma unioqqutinneqarnerani pinerluttulerinermi inatsimmi malittarisassat malillugit aammattaaq arsaarinninnermik suliaqartoqarsinnaavoq.

Inatsisip unioqqutinneqarnerani, taama tulleriillutik, eqqartuussisarnermik inatsimmi aamma pinerluttulerinermi inatsimmi malittarisassat malillugit arsaarinninnerup suliarineqarsinnaanera, aalajangersakkakkut erseqqissarneqarpoq. Taaneqartorpiaat allakkut naammassineqarsinnaappata, sakkut pequtillugu, taama tulleriillutik, eqqartuussisarnermik inatsimmi kapitali 37 aamma pinerluttulerinermi inatsimmi kapitali 37 malillugu arsaarinnissutigineqarsinnaassasut, taamaalilluni aalajangersakkap erseqqissaavigissallugu siunertaraa.

Inunnut 15-iliisimanngitsunut tunngatillugu aamma aalajangersagaq atorneqassaaq, aamma tassani pinerluttulerinermi inatsimmi § 16 malillugu pinerluttulerineq pillugu inatsiseqartitsinermi akisussaatisisoqarsinnaatinnagu atorneqarsinnaalluni. Taamaalillutik politiit assersuutigalugu, inuk 15-iliisimanngitsoq sakkumik pequtimilluunniit pigisaqarpas, § 1 a, imm. 2-tut siunnersuutigineqartoq malillugu ingiaqateqarnissamik aaqquussinerup avataaniittumik arsaarinnissuteqarsinnaassapput, aamma tamatuma kingorna taakkuninnga arsaarinninneq pisinnaavoq.

Aammattaaq inatsisissatut siunnersuummi § 1, nr. 6-imut oqaaseqaatit innersuussutigineqarput.

§ 2-mut

Inatsisip ulloq XX atuutilernissaa siunnersuutigineqarpoq.

Atuutsitsilernissamut ullugititaasoq tunngavigalugu innuttaasut, matumani inuit 15-iliisimanngitsut, aamma inatsisip atuutilinnginnerani, malittarisassat atuuttut malillugit inatsisip malillugit aallaasinik pigisaqartut, taakkuninnga inunnut, 15-ileereersimasunut tunniussisinnaasut ilanngullugit, malittarisassanut nutaanut malinnaasinnaanissaat periarfissinneqarpoq.

Aammattaaq atuutilerfissaatut piffissaliussaq politiit – naleqquttumik annertussusilimmik – malittarisassat nutaat pillugit, assersuutigalugu innuttaasut ataatsimiisinneqarnerannut atatillugu, innuttaasunut ilitersuinissamik tamatuma periarfississavaat.

**Inatsisissatut siunnersuutip inatsimmut atuuttumut
ataatsimoortinneqarnera**

Oqasertaliussat atuuttut

Inatsisissatut siunnersuut

§ 1

Sakkut pillugit Kalaallit Nunaannut inatsimmi nr. 1008-mi 19. december 1992-imeersumi, inatsisikkut nr. 572-ikkut, 10. Maj 2022-imit aamma inatsisikkut nr. 242-ikkut, 7. marts 2023-imeersumit allanngortinneqartumi, allannguinerit tulliuttut suliarineqassapput:

§ 1. Kalaallit Nunaanni politimesterimit akuerineqaqqaartinnani inerteqqutaavoq ukuninnga eqqussinissaq, sananissaq, pisinissaq, peqarnissaq, nassatarinninnissaq imaluunniit atuinissaq

- 1) illuinnarsuutit (pistoler aamma revolvere) aallaasillu naatsut tiggummisarissat allat,
- 2) aallaasit arlalissuarnik aalajangersimasumillu amerlassusilinnik imaqarsinnaasutut (hel- og halvautomatiske) eqqaataasinnaasut, ilanngullugit timmiarsiutit qooroqanngitsunik (manissunik) sullullit/savissallit halvautomatiskiusut, patronenik amerlasuulinnik

1. § 1, imm. 1-imi »sanianissaq« ima allanngortinneqassaaq: »sanianissaq«

2. »§ 1 a. Inunnut 15-ileereersimanngitsunut tulliuttunik eqqussinissaq, sananissaq, pissarsinissaq, pigisaqarnissaq, nassatarinninnissaq imaluunniit atuinissaq inerteqqutaavoq, taamaattoq imm. 2 takuuk:

- 1) Sakkut kiisalu pequtit § 1, imm. 1-imi ilaatinneqartunit
- 2) Aallaasit allat aamma pequtit, § 1, imm. 1-imi ilaatinneqartunhit allaanerusut, matumani aallaasitut isikkoqartut aamma sananeqarnermik imaluunniit atortussat atorneqartut malitsigisaanik taamaattunngorlugit sanaqqinneqarsinnaasut ilanngullugit,

- marluinnaangitsunik
imaqarsinnaasut,
- 3) eqqarasuartaatit
(maskinpistoler),
 - 4) eqqarasuartaatit
(maskingeværer),
 - 5) aallaasit nr. 1-4-mi
taagorneqartut savissaat
(piber), kanngiffii
(låsestole), makisartui
(bundstykker) aamma
niaquusaat (baskyler),
 - 6) aallaasit nr. 1-4-mi
taagorneqartut imassa
(pequtissaat), ilanngullugit
aamma patronit
imaqanngitsut, ikittaataat
(tændskruer) qaartartui
(fænghætter), kukuttaataat
aqerlussaallu/ilulissaallu
(brandrør og projektiler).

Imm. 2-3.---

- 3) Nr. 2-mi taaneqartut aallaasit
savissat, silussaatai aamma
makisartui, nr. 1-mi
taaneqartut aamma
- 4) Nr. 2-mi taaneqartunut
aallaasinut imassat,
matumani aamma patruunit
puui, ikittaatit (tændskruer),
qaartartui (fænghætter),
kukuttaatit aqerlussallu
ilanngullugit.

Imm. 2. Imm. 1
apeqqutaatinngu, inuk 15-
ileereersimanngitsoq, aamma
sunngiffimmi
aallaaniarsinnaanermut
allagartamik atuuttumik pigisalik,
inuk naleqquttumik 18-
ileereersimasumik aamma
inuussutissarsiutigalugu
piniarsinnaanermut allagartamik
imaluunniit sunngiffimmi
aallaaniarsinnaanermut
allagartamik atuuttumik
pigisalimmik ingiaqateqarpat,
piniarnermut atatillugu, matumani
ooqattaasarneq nakersaanerlu
ilanngullugit, imaluunniit
timmisuerialuni
ooqattaasarnermut atatillugu,
aallaasinik aamma pequtini imm.
1, nr. 2-miit 4 ilanngullugu
taaneqartunik nassataqarsinnaavoq
imaluunniit atuisinnaavoq.

Imm. 3. Imm. 1-mi aamma 2-mi
piumasaqaatit
naammassineqarsimanissaat
angajoqqaatut oqartussaasup
qulakkiissallugu pisussaaffigivaa.

Imm. 4. Imm. 2 malillugu inuup
 15-iliisimanngitsup sunngiffimmi
 aallaaniarsinnaanermut
 allagartamik atuuttumik
 peqarnissaa ingiaasup
 qulakkiissallugu pisussaaffigaa.
 Aammattaaq ingiaasup inuup 15-
 ileereersimanngitsup
 ingerlaavartumik
 nakkutigineqarnissaa
 pisussaaffigaa, aamma piniarnerup
 imaluunniit oqattaasarnerup
 naanerani, sakkut pequtillu
 ingiaasumut tunniunneqarnissaat
 qulakkiissallugu.«

§ 2. § 1-imi pineqartunik
 allanut tunniussinissaq
 imaluunniit allanut
 pigisassanngortitsinissaq
 inerteqqutaavoq, pissarsisuusq
 imaluunniit tiguisisuusq
 pisariaqarneratut
 akuerineqarsimanerminik
 takutitsisinnaanngippat.

§ 3. --

3. § 2-mi imm. 2-tut
 ilanngunneqassaaq:
 »Imm. 2. § 1 a, imm. 2-mi
 piumasaqaatit
 naammassineqarsimanngippata,
 sakkut pequtillu § 1 a, imm. 1-imi
 ilaatinneqartut, inunnut 15-
 ileereersimanngitsunut
 tunniunneqarnissaat
 inerteqqutaavoq.«

4. § 3-p kingorna
 ilanngunneqassaaq:
 »§ 3 a. Sakkut pequtillu,
 inatsimmi matumani
 ilaatinneqartut susassaqaanngitsunit
 illersorneqarsinnaasumik aamma
 tикиnneqarsinnaanngitsumik
 toqqorneqassapput.

Imm. 2. Sakkut aamma imassat
 il.il. pillugit malittarisassanik
 erseqqinnerusunik,

isumannaatsuunissaq
eqqarsaatigalugu
pisariaqartinneqartunik,
inatsiseqarnermut ministeri
aalajangersaasinnaavoq.«

Imm. 2. Sakkut aamma imassat
il.il. pillugit malittarisassanik,
isumannaatsuunissaq
eqqarsaatigalugu
pisariaqartinneqartunik, politiit
aalajangersaasinnaapput.«

§ 4. Inatsit manna malillugu
taamaallaat akuersissummik
tunineqarsinnaapput inuit, inuttut
atugarisaat maannamullu qanoq-
inuuseqarnerat pillugit
paasissutissat pigineqartut
tunngavigalugit
akuersisaanissaannut
nangaanartoartinneqanngitsut.

Imm. 2-3. ---

§ 13. § 1-imik, imm. 1, § 2-
mik, § 5-imik, § 8-mik, imm. 3, §
9-mik, § 10-mik, imm. 1 aamma
5, § 14-imik, imm. 2,
unioqqutitsineq, aammalu § 1,
imm. 3 malillugu inerteqqummik
unioqqutitsineq
pineqaatitssiissutaasinnaavoq
pinerluttulerinermik inatsit
naapertorlugu. Taamatuttaaq
pineqaatissiinalersoqarsinnaavoq
kimulluunniit § 6 malillugu
aalajangikkatut patsisissaatitamik
malinnikkumangitsunut.

Imm. 2. ---

5. § 4, *imm. 1--imi*, »inuit,«
kingorna ilanngunneqassaaq: »15-
inik ukioqaleersimasut, aamma«.

6. § 13, *imm. 1-imi*, »§ 1, imm. 1,«-
p kingorna ilanngunneqassaaq: »§
1 a, imm. 1, 3 aamma 4« aamma §
2-p kingorna ilanngunneqassaaq §
3 a,«.

7. § 13-imi *imm. 3-tut*
ilanngunneqassaaq:

»Imm. 3. Kalaallit Nunaanni
eqqartuussisarnermik inatsit
malillugu arsaarinnissuteqarnissaq
pillugu aalajangiisoqarsinnaavoq.
Inatsimmik massuminnga
unioqqutitsinermut
pinerluttulerinermi inatsimmi
malittarisassat malillugit

aammattaaq arsaarinninnerit
suliarineqarsinnaapput.